

CM Mission Yuva

मुख्यमंत्री ओमर अब्दुल्ला होंरें युवा उद्मी विकास अभियान यानि मिशन युवा गी शुरु करने शा पैहले आहिले तैयारिएं दा जायजा लैने गितै कल इक बैठक दी प्रधानता कीती। इस पैहलकदमी दा मकसद उद्यम-कारखानादारी दे राहें नौजवानें गी सशक्त बनाना, कौशल विकास करना ते आर्थिक गतिविधिं च उंदी शमूलियत जकीनी बनाना ऐ। मुख्यमंत्री होंरें समूलचे प्रदेश च एहदे लेई कीते गेदे सर्वेक्षण लेई श्रम ते रोजगार मैहकमे दे जतनें दी सराहना कीती। कल लाई गेदी बैठक दरान श्रम ते रोजगार मैहकमे दे सचिव कुमार राजीव रंजन होंरें सर्वेक्षण दे नतीजें बारै महत्वपूर्ण ते तफसीली जानकारी पेश कीती। उंनै दस्सेआ जे इस सर्वेक्षण दा मकसद उद्यम-कारखानादारी आहली इक ऐसी संस्कृति गी विकसित करना ऐ जित्थे 18एं षा लेइयै 49एं बरें तगर दी उमी दे लोक घटोघट्ट 1 लख 37 जहार नमें उद्यम शुरु करने लेई अगगे औन। इस पैहलकदमी कन्नै अगले 5एं बरें दरान 4 लख 25 जहार शा मते कम्म-रोजगार दे मौके पैदा होडन।

<><><><><><><><>

MSME Ramp

भलेआं लौहके, लौहके ते दरम्याने दर्जे दे उद्यमें लेई इक साजगार म्हौल कायम करने दे मकसद कन्नै जम्मू-कश्मीर च आर.ए.एम.पी. योजना रम्भी गई ही ते एहदे तैहत उधमपुर जिले च अपनी चाल्ली दी पैहली-पैहली जिला-स्तरी आर.ए.एम.पी. जागरूकता कार्यशाला दा कामयाबी कन्नै आयोजन कीता गेआ। इस कार्यक्रम दा आयोजन जम्मू-कश्मीर च बपार-

कारोबार गी बढ़ावा देने सरबन्धी संगठन - जेके-टीपीओ ते ग्रांट थार्नटॉन भारत एलएलपी आसेआ सांझे तौर उप्पर जिला औद्योगिक केन्द्र दे सैहयोग कन्नै कीता गेआ। एहदे कन्नै गै जिला स्तर उप्पर सरबन्धत लोकें तोहड़ी पुज्ज बनाने आहले आउटरीच कार्यक्रमें दी श्रृंखला बी शुरु होई गई ऐ। भारत सरकार दे एम.एस.एम.ई. मंत्रालय दी एह पैहलकदमी, विश्व बैंक दे समर्थन कन्नै तोढ़ चाढ़ी जा'रदी ऐ ते एहदा मकसद भारत च एम.एस.एम.ई. खेतर च नमैं सिरेया जान भरना ऐ।

<><><><><><><><>

Judges High Court

सुप्रीम कोर्ट दे कोलेजियम नै द'ऊं वरिष्ठ न्यायिक अधिकारिणं संजय परिहार ते शहज़ाद अज़ीम हुंदी जम्मू-कश्मीर ते लद्दाख हाईकोर्ट दे जजनें दे तौर उप्पर नियुक्ति दी सफारश कीती ऐ। भारत दे प्रधान न्याऽधीश जस्टिस संजीव खन्ना हुंदी अगुवाई आहले सुप्रीम कोर्ट दे कोलेजियम नै कल लाई गेदी अपनी बैठका दरान इस सरबन्धी प्रस्ताऽ गी मंजूरी दिती। संजय परिहार होर मजूदा समें च डेपुटेशन पर जम्मू-कश्मीर बशेश ट्रिब्यूनल दे सदस्य दे औहद्धे पर काबज़ न जिसलै के शहज़ाद अज़ीम होर जम्मू-कश्मीर ते लद्दाख हाईकोर्ट दे रजिस्ट्रार जनरल दी जिम्मेदारी सांभा करदे न। मजूदा समें च जम्मू-कश्मीर ते लद्दाख हाईकोर्ट च 25 स्थाई जजें दिआं मंजूरशुदा असामियां न जिंदे च 19 स्थाई जजें ते 6 अतिरिक्त जजें दिआं असामियां शामिल न। उ'आं मजूदा समें च हाईकोर्ट च मुख न्याऽधीश हुंदे सने कुल 13 न्याऽधीश गै न ते कोई बी अतिरिक्त जज नेई ऐ।

<><><><><><><><>

Chauhan BRICS Meeting

कृषि ते करसान कल्याण मंत्री शिवराज सिंह चौहान अज्ज ब्राजील च ब्रिक्स देशें दे कृषि मंत्रियें दी 15मीं बैठक च हिस्सा लैरदे न। इस बैठक च ब्रिक्स देशें बशकार समावेशी ते टिकाऊ कृषि गी सैहयोग, नमिएं काहडें ते बरोबरी पर आधारित बपार दे राहें बणावा देने दे विशे उप्पर चर्चा होग। चौहान होर ब्राजील दे कृषि ते पशुपालन मंत्री कार्लोस हेनरिक ते कृषि विकास ते परोआरिक कृषि मंत्री लुईज पाउलो हुंदे कन्नै बी दपक्खी बैठकां करडन। साओ पाउलो च ब्राजील दी प्रमुख कृषि बवसाय कन्नै सरबंधत कंपनियें ते ब्राजील दे खाद्य तेल उद्योग संघ दे नुमाइंदें कन्नै बी उंदी गल्लबात दी मेद ऐ।

<><><><><><><><><>

World Heritage Day

पुरातत्व ते अजैबघरें सरबंधी मैहकमे नै ऐलान कीता ऐ जे कल 18 अप्रैल गी विश्व विरासती ध्याड़े दे मौके उप्पर सब्भनं गी श्रीनगर दे एसपीएस म्यूज़ियम ते जम्मू दे डोगरा आर्ट म्यूज़िम च मुफ्त एन्ट्री दिती जाहग। इस गेंह दा मकसद समाज दे सब्भनं वर्गें गी प्रदेश दे सगगोगार सांस्कृतिक विरसे ते ऐतिहासिक महत्व आहिलें चीजें दी झलक दस्सना ऐ।

<><><><><><><><><>

Drug Peddler

प्रशासन आसेआ कल सांबा जिले च इक कथित नशा तस्कर दे 2 मंजिला घरें गी ँहाई दिता गेआ ते केई सारे संदिग्धें गी हिरासत च लैता गेआ ऐ। बदनाम नशा तस्कर लाहु गुज्जर आसेआ बिरजू चक्क ग्रांs च इस नमें बनाए गेदे मकान गी जम्मू-कश्मीर पुलसै जंदे रोज ँहाई दिता। तोआई इक होर कार्रवाई दे तैहत पुलसै बलोल खड्ड, गुज्जर बस्ती ते बड़ी ब्राहमणा दे कन्नै लगदे होरनं इलाकें च छापे मारियै केई लोकें गी पुच्छगिच्छ लेई हिरासता

च लैता। एह कार्रवाई, जंदी 10 अप्रैल गी पुलसकर्मीएं पर होए दे हमले दे सरबंधे च कीती
गेई ऐ जेहदे च सरबंधत एसएचओ गंभीर तौर पर जख्मीं होई गे हे।

<><><><><><><><>

IPL

आईपीएल क्रिकेट च मुंबई दे वानखेडे स्टेडियम च अज्ज सनाराइजर्स हैदराबाद दा मकाबला
मुंबई इंडियन्स कन्नै होग। मैच संजा साढ़े 7 बजे शुरू होग। तोआई कल संजा दिल्ली दे
अरुण जेटली स्टेडियम च खेड्डे गेदे इक मैच च दिल्ली कैपिटल्स नै राजस्थान रॉयल्स गी
दिलचस्प सुपर ओवर मुकाबले च हराई दिता। पैहले बल्लेबाजी करदे होई दिल्ली दी टीम नै
20एं ओवरें च 5 विकटें दे नुकसान पर 188 द्रौड़ां बनाइयां जेहदे परते च राजस्थान रायल्स
नै बी पूरे 20एं ओवरें च 4 विकटें दे नुकसान पर 188 द्रौड़ां बनाई लैतियां ते मैच बरोबरी
पर आई गेआ। आईपीएल दे नियमें मूजब फही सुपर ओवर कराया गेआ जेहदे च राजस्थान
छड़ी 11 द्रौड़ां गै बनाई सकेआ ते दिल्ली कैपिटल्स नै 4 गेदें च गै जित्त अपने नां करी
लैती। इस सीजन दा एह पैहला मैच हा जेहदे च दवै टीमां बरोबरी पर रेइयां ते सुपर ओवर
कराना पेआ।